
## Агъулрин Халкьдин хазинаяр



ББК **82.3**(2Р-6Д)-**433** УДК **821.351** С-**59** 

Агъулрин халкъдин хазинаяр: MerI-C-59 нияр. /Сост. Ахмедов К. – Махачкала: ГАУ РД «Дагестанское книжное издательство», 2021. – 104 с.

Сокровищница народной мысли: Агульские народные песни.

Ме китаби агъул халкъдин мегІнияр аттихьая, гиса чпин фикирар, умудар, къайгъуяр, багайихъди алдаркунде хиялар агвар акьуная.


ББК **82.3**(2Р-6Д)-433 УДК 821.351

C M 123 - 2021 62 - 2021

© Ахмедов К., составление, 2021

© Дагестанское книжное издательство, 2021

ISBN 978-5-297-02216-4





КуьтехІ дахьа ерхе майдан, Вахъ хъуьхъве тук амева. Йе зас кане, батІар руш, Вахъ ле йуркІар амева.

\* \* \*

Гьаварил гьава канчи, Суварил чардах алихь. Ве йуркІурал зун алчи, Улилас булах алихь.

\* \* \*

Джан джуьхІелин джагвар тук, Шавгьари кехъу цІабар. Гуьнейин ире цІантук, Рагъарифас гъуш нурар.

Шалбуз дагъдин чуълле лиф, Женнетифас рангар гъушуф. Тик гуънейин ире цІантук Сегъерифас нурар гъушуф.

\* \* \*

Хьин дуьйил алчархьурай, Гъазе чІирил чиг суман. Хьин дуьйихъ хъучархьурай, Булахихъди хьед суман.

\* \* \*

Мизе, мизе угъая, КІилил тІинкІар латІая. КІилил латІу тІинкІари КІил иттай, алархьая.

\* \* \*

ХІуппахъан, угъал угъая, Литикас чардах акъе. Зе кане руш Іашая, – Уликас булах акъе.

Угъал, угъал угъурай, Угъал мелхІеф угъурай. Зарбуна зав рахуне, Лазе ибад хъитгурай.

\* \* \*

Гьамиша гІулар кандий, ГІулин цІантукар кандий. ЦІантукаригІ гІадаркай, Ширинди рахас кандий.

\* \* \*

Рекъкъ упуна ушуна, Къирагъилас фархъуне. Тук э пуна атІуна, – Тикан хъуна гъузуне.

\* \* \*

Рагъ атай, угъал атай Гъазе чІирар къач хьуне. Ери багун дард дуай Джегъил Іуъмуър пуч хьуне.

ХІуппар укьа азалар Мизе зазарин хьурай. Келар укьа укунар Хъуьхъве тукарин хьурай.

\* \* \*

Вун зафас варха магІва, Зе улар вахъай гІвая. Вун дагуна уьлгучи, Эслина Керем хьая.

\* \* \*

Шамагъажин даран кІенак Канеф укьу ругъу булах. Хил дафацай ушу рушас Зе паттаас салам фаях.

\* \* \*

Гьава дагъдил ругъу булах, Ругъу хьиттан ун адине. Гимил але джегъилрикас Зе къелемин сес адине.

Айдихьас вун вартис хутурф, Аман гада, ухІаф хьурай. Пара дардар йуркІура хьу ЙуркІуралас ухаф хьурай.

\* \* \*

Хьидин бере багъди битмиш, Лап ире тукар э рушар. Хамди дагълари ухІу Ухьтан джейранар э рушар.

\* \* \*

Шалбуз дагъдин гъава кІилил Шавгъар хъугІвай кулак аме. Язух хъаду, джан кане руш, Вари хъугІвай, вун амуъргу.

\* \* \*

Хандин багъдин айди кІили Чай руьхьейде булах ая. Джагвар берхІем але, йе руш, Ве джанди фи дамах ая.

Ери дагъдин кІилил шуна Шалбуз дагъдин кІенас душуф. Бахтар паяр акьагуна, Іакв дагуна, йуркІар угуф.

\* \* \*

Вун пенжерар мадахъа, руш, Зун гимилра гъузуная. Валлагь, канеф, ул даацІай Зунра кІесе, угуная.

\* \* \*

Джанавурдин аликlай хам, Хам джиларил гlвас канде. Туку айе баван ватан, Джандиласра ухlас канде.

\* \* \*

ГІвайчи вас ягьур хьурай, Рагьун улар удигьай. ГІвайчи вас ягьур хьурай Хьиттан хулар хуппахьай.

ЦІагІафударин ацІу ваз, Бег валасра ацІуфе. Къирагъ ІуьрчІе калагъан Сус валасра батІарфе.

\* \* \*

Канде пуна акьуфе, Къизил тІубал гъушасе. Айарилле кел суман Іашкъарилди ухІасе.

\* \* \*

НацІул алеф цІуд э гьан, ЦІудураллеф гІуд э гьан. Гьава айванихъ хъайеф Засра кане руш э гьан.

\* \* \*

Гьава сув хьиба хьурай, Вун айе джига агвас. Йерхе рекъкъ мукьул хьурай, Мезуран чІалар гьургъас.

Лайшурай абан улар, Вас дала ярхІаф эйчи. Чурхъурай гІанан йуркІар, Вун дала канеф хъайчи.

\* \* \*

БатІарф кандева, мурад, Канеф кандева, мурад. БатІарф нацІун цІин хьурай, Канеф канде, уп мурад.

\* \* \*

Айдихъас фачучІу рагъ, Нур ве хулас ярхІуне. Тукарин кунар але, Сус чве хулас рукьуне.

\* \* \*

Хили айе Іабасияр, Шабаш акьай куьтехІ хьуне. ЭшкІинарра гъамаз хьуна, Джегьил рушар вархас хьуне.

КІилил але андава таж, Зун къаншари ая ярдин. Баван хиял чІирикІа э, Хъишав бугус, уп вун рушас.

\* \* \*

Зунна вунна сараф дава, Кандава ве хІуърмет аргІас. Макьа вунра лап Іайе курар, Дуьйилас вун кандея зас.

\* \* \*

Ме багра дагь, те багра дагь, Арайи айе тукарин багь, Руш гадайис кан хьугуна, Кьисмат дахьуб фи делил э.

\* \* \*

Ай сувар, гьава сувар, КІиларил ихьпар але. Гьава суван укунар, Халкьарин хІуппар але.

Вартиас ахъ гІва тахІур хьед, Кейикьуна мерте хьурай. ЙуркІурал але дардар Нагъвар хьуна, алайшурай.

\* \* \*

Гада, вун зе йуркІуралас Лап кІичира, гІвастава хи. Вун атуна, сараф дахас, Мурад цІайис цІастава хи.

\* \* \*

Гьава дабан, гъазе берхІем, Чинар даран буй хъайе руш. Вун агвай зун хьая тебдир, Битмиш багъдин нур але руш.

\* \* \*

Шав булахил, джан кане руш, Хьед ицІасе зун хилиас. Вун агвай зун хьая гьейран, Пара гуьрчек, ширин джейран.

Зун вун э ва, Іу йуркІ айе, На аргІуне ве гуьгьуьлар. Булахилле къарасу хьед, Гвара айе чемер э гьан.

\* \* \*

Устулилле графинка Хил хъуркьуна дааргІурай, Лап зас кане, алагуьзли, Сараттисра гІвас дахьурай.

\* \* \*

ЧІигъанилле джагвар тІубар, Лап кІур хьуна, рукъкъай ая. Ухьтан алмас, зе кане руш, Зун армисра рукьай ая.

\* \* \*

Якьу цилис файдиф эва, Алагуьзли, зе кане руш. Вун сараттис индеф эва, Зун андавай, зе гуьзел руш.

Вун адава – рагъ адава, Вун адава – ваз адава, Вун адава – бахт адава, Вун адава – Іуьмуър кІандава.

\* \* \*

Гьава суван кІиларил, Угьафе джагвар ихьпар, Хьин суман кьехІаларил ГІвафе ягьар ва Іуьшар.

\* \* \*

Гьавайил але хулар, Халуман кІаре улар. Халумра варха хьучи, Нас ярхІасе зун улар.

\* \* \*

Укунихъ хъайе тукар, Чвас кане – даканф фи э. ТукаригІ гІайе цІабар, Чве мурад – метлеб фи э?

ХІуьлин кІена айчинра Хьиттакас дацІу балугь. Суван кІилил алчинра Тукарикас дацІу цІантук.

\* \* \*

Дардар алеттар ая гьан? Дуьйил угуттар ая гьан? Але дардар агвар дакьай Дуьйилас ушуттар ая гьан?!

\* \* \*

ЦІикІинар акьуттарис, ЦІикІинар мубарак хьурай. Дакьуна, аметтарис, СеІэт иджеф акьурай.

\* \* \*

Гуьне верхІар уцая, Парзайил ул руцая, Парза гьич улис дагвай, ІуркІ Іашали ацІая.

Дженнет багъдин емишар, ЦІаб алархьай гъузуне. ЙуркІурас кане, Іазиз, Нагъв алархьай, гъузуне.

\* \* \*

Адине чин раккахъди, Гъайш ле вун тІагарихъди. Мезар – Іамалар акьай Файдине сус раккарихъди.

\* \* \*

ЦІикІинар кане хІулар Маджлисин уьдигІ хьурай. Валлагь, хье дадарин хІуьрар Бахтарин уьдигІ хьурай.

\* \* \*

Кьиблайихъас адина Рагъ ве хулас архьуне. Шукур хьурай Аллагъдис Вун мурадихъ рукьуне!

Гьава сувал але ихьп, Вун фидахІан джагварфе. Гьич канеттис дахьу, руш, Вун фидахІан пашманфе.

\* \* \*

Вун хулахъди гІвайде рекъкъ Ири тукарин хьурай. Ве лак куъркъуъ джигаяр Лап къизилдив ацІурай.

\* \* \*

Дуьйил укьас кедавайчи ІуькІеригІ тук дахьурай. Вун хъадавай хьас канчи Зас дуьйара даирай.

\* \* \*

Агь, кане шеъ э дуьнья, Метлебар бегьем хьучи. Мас адава Іуьмуьрдис, Канеттис канеф хьучи.

Вархалас вун гІваф хьучих, Хула адавай хьучи. ЙуркІурафас кане, Іазиз, Фикьас кьисмат дахьучи.

\* \* \*

Джан баван, Іазиз кІиркІ, Фас хьуфегьан вун. ТегІди дуьйилас ушуф, Накьварин Іазаб агвас.

\* \* \*

Бавахъ хъайе кьехІал, Накъвари фишти учІасе. Дадахъ хъайе кел, Джагвар яккар утІасе.

\* \* \*

ФидахІан хьурай чІалар, Вун дуьньяйил андава. Уларилас гІвай нагъвар, Бав вахъ сара хъандава.

Етим исар зе хьуне, Кане бавра хъандавай. Джегьил Іуьмуьр гулуне. Баван куъмек андавай.

\* \* \*

Джан зе чу, багьа зе чу Багъдиасра агъучІуф. Рагъухъас хъайчІуна Сериник э вун ушуф.

\* \* \*

Вари рекъкъери ая гьан? Арайи хулар ая гьан? Вун дагуна, зун кІичин, Вас зе язух хьасту гьан?

\* \* \*

Дахьурай дадахъ гада, ЙуркІ адавай, са чІирхІеф. Дахьурай гадайихъ дад, Са пише, кар кедаваф.

Сув ацІафе дифари, Угьал угьас канхьугуна. Ул ацІасе нагъвари ЙуркІар исал хьугуна.

\* \* \*

Шав рушар, дагъдилди гІвас, Китикар гунтІра акьас. Китикар гунтІ акьуна, ІуьрчІе берхІемар акьас.

\* \* \*

Ихьп суман джагвар къварик, Тук суман Іу руш кея. Сад ире легІли э, Сад — кІаре бегІли суманф.

\* \* \*

Шав, рушар, гІулар гІвая, Тукарис лакар ярхІас, Іуьмуьрар дехи гІвая Мурадар бегьем акьас.

Рекъкъуъл але хуъцІе гъван, Хьасе гьан цилил алихьас. Бав хъандавай етим кел Хьасегъан хилихъ ухІас.

\* \* \*

Фише гьале эргъвелихъ хъайеф? Куппарин цилив файеф. Шувас гІвас кьана хьай, Хилив гуьгІвенар файеф?

\* \* \*

Рангар батІар улусум Вун чІаларин дахьурай. Улар батІар улусум Вас улинра дахьурай.

\* \* \*

МагІва, руш, вун бавахъай, Якк атІу душмандихъай. МагІва вун, кІиркІ, дадахъай ЙуркІ утІу алкашахъай.

Хаб алдаркай вун найче? Зун ругъу илан дава. Мезуран жаваб дайцІай, Ве дад кІи душман дава.

\* \* \*

Мухурарин кІаре кел, Бармакарис марукква. ХІуьрар – хулар минете, Зе канеттик макерхІа.

\* \* \*

XІуьрил хулар алмегьан? ХІуьрихъ фишра амегьан? Агъзуракас сайинра Хьин йуркІурал алмегьан?

\* \* \*

ДарагІ дар дахьурай, Джили дувул адавай. Бавахъ са кІиркІ дахьурай, Хуппахь уьлмет хъадавай.

Дадан баварин мехІел Вун Аллагьди ухІурай. Чуяр чиярин цІиял, Вас Аллагь куьмек хьурай.

\* \* \*

Хъуьхъве тук, ире цІантук, ІуькІверигІай рукъкъас гучІай. Ягъар – мензилар акьай ЙуркІуралас гІвас гучІай.

\* \* \*

Тук ирирай зазарин, Ізъ кІаре з вазуран. Акьай хиял агъзурра ЧІал дагурай мезуран.

\* \* \*

Рагъар дагва гъванарис Гъарай, рагъар ярхІуне. Іаквар дагва сукъкъурас Гъарай, аквар агуне.

ЯгІа зун пашманди ая, Диллай аман, даллай аман. Зе канетти «ваъ» упуне, ЙуркІурас гиранди ая.

\* \* \*

Вархалас улар маярхІа, Хуппахъ хажалат дахьас. Бугулас сирар макьа, Хуппахъ муьхІуьббат дахьас.

\* \* \*

Улар батІарф хьугуна, Улусум упуне зун вас. Ранг батІарф упуна, ТІавус къуш упуне зун вас.

\* \* \*

Вун багъдин емиш хьурай, Вакас ире хІач хьурай. Вахъас даруцу лакар, Къвакъварикас къатІ хьурай.

Я руш, вун найса айий, ГІуд хьуна хуппури айий. Вун суман батІар рушар, Че хулан мурту айий.

\* \* \*

ГьайчІ, шинюккар, уьдигьас, Бегна сус лахъунис гІвая, Дахъ женнетин къапуяр, Бегна сус ачагІвасе.

\* \* \*

Адине вун, хвашкалди, Джагвар либас аликІай. Амуъргурай нур алдий, Кане шуван йуркІ алдий.

\* \* \*

Гьава суван укунис Хьин лакар ярхІундава. Хьин тукун Іуьмуьрди ай, Хьес Іаквар агундава.

Гъар замандин джегъилар, Бахтар хъаеттар хъурай. Гъар замандин инсанар, Багъдин Ielэни хъурай.

\* \* \*

Сув ацІу мизе угъал Гъал хІуърисра рукьасе. ЙуркІурас кане мурад Гъал хуласра рукьасе.

\* \* \*

Тек са тукун Іашкъуна Вари багъдис хьед ицІасе. Багъра бегьем дакьуна, Багъди хьедра гуласе.

\* \* \*

Дагъди ІуькІер мус хьасе? ІуькІеригІ тук мус хьасе? БицІиттарра ахІа хьуна, Мурадар бегьем хьасе.

Ме хье гьава суварис Тукарин ранг адирай. Хье хІуьрин джегьиларис Бахтлу ягъар агурай.

\* \* \*

Заварин ранг але тук, Джиларис нур ицІай тук. Ери мурадра хъайе Мурад бегьем дахьу тук.

\* \* \*

Я, руш, вун хулан э баракат, Вун батІарди агурай. Кардис акьай хІаракат, Гьамиша кардик хьурай.

\* \* \*

Фикьас агуне уларис, Агуна, гулас кееф. ЙуркІурас вун кан хьуне, – ЙуркІуралас гІвас кееф?

Шав чун че хуласра, Укьас, салам алейкум. Гьамишанди чвас агъай Ваалейкум, вассалам.

\* \* \*

Сувар пара гьавайил, Рекъкъер пара ерхе э. Чунра дагвай уларис, ЙуркІар пара кІаре э.

\* \* \*

Авал авалра кандий, Авал замана кандий, Авал заманра дала, Гьалдин Іакьулар кандий.

\* \* \*

Рекъкъеринра къирагъил Чун чвас тукар узасе. Ле чвас кане дустар хъай Чин чун рекъкъуъл акъасе.

Агь пуна хьунде фикир, Хъаттакьас чуьллар кандий. ЦІай керхьуна угу йуркІ Са ягъ суман хьуф дава.

\* \* \*

Рагъар дагу гъванарис Гъарай, рагъар ярхІуне. Іаквар дагу сукъкъурис Гъарай, Іаквар агуне.

\* \* \*

ЙуркІурал хьу вахтуни ЙуркІ Іашали ацІуне. Мезурал хьу вахтуни Джан хиялри фацуне.

\* \* \*

Ширинди чІал гъургъучин, Шейэрин жинас агъарай. Зарбунди лак ихьучи, Дава минет атарай.

ГІан утІуна къарк хьуне, ХІач, вак дарман кендава. Пара фикирар акьай, Я чахъ аман хъандава.

\* \* \*

Хьин дуьйихъ хъучатурай, Хьидин джилихъ хьед суман. Хьин дуьйихъ алчатурай, Гъазе ІуькІил чиг суман.

\* \* \*

Парзаяр гьава хьуна, Уларис хъагвасту гьан? Мензилар варха хьуна ЙуркІуралас гІвасе гьан?

\* \* \*

Тук тІушайде, гІулин дуьнья, Я руш, вун найса айий? Бахтар пай акьагуна, Вун къариблухди айий гьан?

Алеф – суван кІилил э, Агваф – кІаре дагьар э. Вариттарин чияр э, Душмандин дард джуьреф э.

\* \* \*

Тукарин десте агвай, Са тукун джан угая. Намусиас вартал дакьай, ІуркІураас Іашая.

\* \* \*

Дардуман баван ватан, ЙеІэнигІ мазгит айеф. Дардуман баван ватан, Якьу багу пирар айеф.

\* \* \*

Ерхе рухан хьед дехІан Уларилас нагъвар шуне. Завулас къири дехІан, Джандилас дардар шуне.

Укун тукунф эйчинра, КІил дагъаду батІар тук. Сув цІантукинф эйчинра, Ул даярхІу хІучан тук.

\* \* \*

Гъавайилас ярхІу ул, Вас дала куъркъадава. Фагъум акъу йуркІура, Вун дала дуаф дава.

\* \* \*

Гьава суван улусум, Сувалас сувал гІвайеф. Гардан гьава галун къаз, Сувалас сувал гІвайеф.

\* \* \*

Сувар гъаваттар хъуна, Са лак ярхІас хъундава. ЧІирар батІартар пуна Я ул ярхІас хъундава.

Кьасустира акьуф суман, Гъазе махпур дуу суман. Агвар акьас ухІу суман, Фи батІар э, агъул сувар.

\* \* \*

ІуькІвер дагьучІа джил, Угьалар фикьас угьайе. ЙуркІура дахьу курар, КІиларил фас хье гІвайе?!

\* \* \*

Іашаларихъ баварин, Іашай хьуне гьава сувар. ЦІай алгъархьу заварил, Зурзуне лакук джилар.

\* \* \*

Дардуман гІве Бабул ус, Мангъулар вал гъамал хъуф. ДжемеІати лихьай уъст, Татарар барбатІ акьуф.

Душман хІуьри дачатай Къанна гІафу ягь хьуне. ДжемеІати джан лихьи, Хъушуб чІирхІес акьуне.

\* \* \*

Са къат цІас пун къизилар Къапуйил хьу къуджайис. Секин хьухилди хІуьринтар ХІазур хьуне масацІас.

\* \* \*

XІуьрил алдий цІайна кум, Зурба дегІуь гъайшине. Якьу багун агьузарихъ Гьава сувар Іашуне.

\* \* \*

ТІурфан гъузу мазгитал ГунтІ хьуна алмий халкьар, БарбатІ хьу муьхІуьббатил Алгъархьуне иин селлер.

Іуьссеф, шинюк дагъай Раттарил фаттахъуний. Къизил игар хъихъуна Гъатуъррил алдаркуне.

\* \* \*

Дардуман ЧІаарин хІуьр, Еригала кеттархьуне. ДжемеІати джанар лихьи Еригала кегьархьуне.

\* \* \*

Авар, дарги, къумух, Лезги, агъул, яхул, Іурус. Чияр-чуяр хьуна вари, Зе Іакв э вун, Дагъустан.

\* \* \*

Дуьньяйил кьагьар лихьай Сувал лихьая кехун. Ватанил дардар лихьай Гулая Іуьшан ахун.

Ерхе Іуыпан багиймикас Дуьйил гьарай гъузуне. Зе Ватанин гьарайихъди Гьава сувар гьайшине.

\* \* \*

Хасегьан зал яраб бала, Ве тагІрифин, Чархъи-къала. Зун акьучин, дардуман ЭхІтият акьу суман.

\* \* \*

«Сиясат» – ачух къапу, «Іу игитис исал э», – пу, Чулахъ Тимур рукъуне, Булахин хъед рукъкъуне.

\* \* \*

Бавахъ хъайе батІар руш, Лап кел суман ахІа акьуф. Іашкъар але испагьи, Іаламат эй час агуф.

Баван йуркІар агвайде, Ире цІабун цІантук тук. КІил джилари икІунде, Пашман хьунде хІучан тук.

\* \* \*

ІеІани ае ІатІул Керхьурай ве Іае тІул, Ле ве дадар — бавари Дуурай валас Іу тІул.

\* \* \*

Парзайихъ руца диф суман, Чин вахъай руцай аме. Угъалихъас чІир суман Чин вахъас Іашай аме.

\* \* \*

Муул ире – ире джакъв, Пайгъамбарди э рухуф. Мухур джагвар галун джакъв, КегІбайис мухур ярхІуф.

Джагвар ихьпар цІурурай СагъгІвел ирай, кІаре ул. Душманарис джуваб ицІас, Сив сагъ хьурай, кІаре ул.

\* \* \*

ШимшитІ багъдин булахил Туътуъкъушар адирай. МуъгхІуъббат хъайеттарис НасигІат уъчи ирай.

\* \* \*

Арсуран мизе чІалар, Гьа нас ярхІурай улар. Вун чафас варха хьучи, Хьин нас акьурай сирар.

\* \* \*

Вархалас улар маата, Хуппахъас хажалат дахьас. Бугуфас сирар макьа, Хуппахъас муъхІуьббат дахьас.

Женнет багъдин булахил Туъттуъкъушар адине. Ширинди чІалар рахай Ара серин акъуне.

\* \* \*

Рагъ э гьан, чирагъ э гьан, Дагъларилас файчІуф. Тук э гьан, цІантук э гьан, ІуькІеригІас фагъучІуф.

\* \* \*

ГІулин емиш вун хьурай, Вакас ире хІач хьурай. ЙуркІурас пара канеф, Вун битмиш хьайдеф хьурай.

\* \* \*

Дербенарин джагвар гъванар, Вун цилиъ мудам хъурай. Наврузбегис хайде руш Ери кІиркІин бав хъурай.

Базарин къизил алма Вун базари аме гьан? БицІигунлас кане руш, Ве йуркІура аме гьан?

\* \* \*

Ул батІарф иде пуна, Улусум пуне зун вас. Ранг батІарф э пуна ТІавус къуш пуне зун вас.

\* \* \*

Парза завар сад хьуне, Рагъна ваз къаншар хьуне. Гъагъархьунде кІаре къири Сад сайихъас гъишине.

\* \* \*

Агь, парзайис ярхІу рагь, Джиларил кикІу чирагь. Вун дахьучи зе уджагь Кьут-кьунал дахьурай.

Бава гужж акьунева, Тухум гужлу хьунева. Ле вас дакан явайил Вунра алитІинева?

\* \* \*

Ме цулин ерхе Іуьшар ФидахІан ерхе хьуне. Кьисмат дахьаф хІайдуйва, Муьгьуьббат ве аргІуне.

\* \* \*

Женнетин гъазе зумруд Шав чин чвас агвар акъас. Ле вас кане мурадихъ Шав чин чун рукъас акъас.

\* \* \*

Заварин хІадар суман Зун вун Іакве акьасе. Джиларин тукар суман Чин чун джегьил акьасе.

Шав хьин лап икърар акъас, Икърар – иман сад акъас. Икърар – иман сад хъучи, Дуънья са багул акъас.

\* \* \*

ЦІай кее цІантук хьурай, Зун ве верхІеас айчІвас. Хер кее нечхир хьурай, Ле ве багъди муг акьас.

\* \* \*

УчІас дагІва дагьаригІ Са цІантук кьисмат хьуне. Аман зе йуркІ але, Іазиз, Уларигьас гулуне.

\* \* \*

Ве канегІвелис фикьа, Хандин чІаларис фикьа? Нагагьди хьин варха хьучи, Угу йуркІарис фикьа?

Гьава суван кІиларис Улусумин ун гІвая. Джагвар калагьандикас Сусан улар агвая.

\* \* \*

Вархалас ярхІу улар, Вун дала агвадава. Аттархьайде йуркІурас Вун дала агвадава.

\* \* \*

Вун гимаригІ аруцай, Ге гим майданар макьа. Тагарарихь хъучурхьай ТІагарар цІурас макьа.

\* \* \*

Сус джандакин ерхефе, Іуьрче ягълухъ дуьхьефе. ЧІалар дагъай, ул атай Фикьас, руш, вас хъел кея.

Гьате зун угас макьа, Угуна кабаб макьа. Хьес Іуйисра хІар хьуне, ХІуьринтарис хІар макьа.

\* \* \*

Угъал дахьай гъванариг Тукар фикьас айчІуне. ЙуркІура дахьу курар КІилил фикьас адине?

\* \* \*

Джагвар бухари бармак, Гъава заварик кетІуф. ЧІичІ арсуран багьа лит, Гъазе чІирилас ярхІуф.

\* \* \*

Ай, багъларин багъманчи, Вас багъдин хІал хІая гьан? Ай, нацІун хьед даухуф, Вас къарасу хьед хІая гьан?

Агь, идже дава хьучин, Зулумра дава дахьучин. Хъара ахІа зулум дава, Кьисмат дахьуна кІичин.

\* \* \*

Агь, багъдин ширин емиш, Хьасегьан курар битмиш. Курар битмиш дахьуна, Хьасегьан хьин ягъалмиш.

\* \* \*

Дардар акьас гъузучин, Исарилди куърк Пастава. Вари ч Палар гъуджичин Газитарра гъурк Пастава.

\* \* \*

Агъай-агъай гъван хьуне, Гъурбатира мукь хьуне. Гъурбатдин чІалар рахай, Нугъатар джуъре хьуне.

Арсуран йуркІуралас КІаре хиялар гІвая. Къизилдин уларилас Кишмирин нагъвар гІвая.

\* \* \*

Малар хъайе девлетлуйи Мал закати ицІайе. Кесиб дадар – бавари Руш закати ицІая.

\* \* \*

Улар ацІуна пуна Нагъвар гІана джикІасева? Хиял акьуна пуна, Битмиш гІана хьасева?

\* \* \*

Хифатарин хула айеф, Даран кІаре кІур хьурай. Дардарин дуьйил алеф НацІун чуьлле гъван хьурай.

Бав хъадава етим кел, НакьвараригІ илгуне. Бавар хъайе джегьилар Сувар уцас ушуне.

\* \* \*

Укунил але тукар, Вари фикирар макьа. Джандил алихьи къакъкъар, Вари хиялар макьа.

\* \* \*

Агь, пуна эл гьатучи, Диф хьуна сув ацІурай. ГІанан сирар акьучи ГІан бархуни ацІурай.

\* \* \*

ЦІантукин сув э пуна Са-сад лакар ихьуне. Гьава суван кІил хьуна, Лакун джарар файшуне.

КІесегьан, икІасегьан, КІилихь укьаф хьасегьан? КІилихь укьаф дахьуна, Улар Іашаф хьасегьан?

\* \* \*

Дуьньяйин батІаргІвелди ЯрхІу улар ацІадава. Іуьмуьрдин канегІвелди Са ягъ хьу суман дава.

\* \* \*

Муулар рахадехІан Валлагь, бизаре джанар. Хиялар акьа дехІан Валлагь, исале йуркІар.

\* \* \*

ТІибитІин иджгІвелдиас Хьед дала джикІиндава. Дуьньяйин батІаргІвелдиас ЯрхІу улар ацІадава.

ЧІал пучи йуркІурак хьай, Уларилас нагъвар гІвай. Пуч макьа джегьил Іуьмуьр, ЙуркІуралас хиял гІвай.

\* \* \*

Ай, сувар, гьава сувар КІилар дифарин сувар. ГІурчахъанар хъихьуна Жейранар гьиши сувар.

\* \* \*

ЦІантукин сув э пуна Са-са лакар ярхІуне. Дарманин хьед э пуна, Агъуйин хьед ухуне.

\* \* \*

Дуьнья даи инсанис Эхират иджеф ирай. Эхиратра даичин, Эхир фи джуваб ирай?

Шав Іудра айчІвас булахил, БачІ гІадаркай, дард акьас. Налра алчи дард-бала Шав Іуйисра пай акьас.

\* \* \*

Дагъ фацугуна туку, Хьин къалин кехуник кей. Бахтар пай акьагуна Вариттарин хуппахъ хъай.

\* \* \*

ХІуьлилас диф тІушуне, Сува угъал угъуне. Сува угъу угъали ЦІантуки джил фацуне.

\* \* \*

Тук тикани фацуне, Элди гьарай акьуне. Рагъ дифари фацуне, Чинра гьарай акьуне.

Сув фацу джагвар кехун, Джагвар бембегин ахун. Хьин Іуд вархал акьутгин ГІана дуурай балхун.

\* \* \*

КІес пуна иттархьурай, Кафанар хІазур хьурай. Хьес хІазур хьу кафанар, Душмандис кьисмат хьурай.

\* \* \*

Тук атІуф, тикан атІуф, Ули атІурай, Іазиз. ХІач атІуф, джихер атІуф, Силев сиркирай, Іазиз.

\* \* \*

Джакьв даруцу суварил Айрупалан адине. Деги даруцу рекъкъерил Автобусар адине.

Гьава атай маруца, Вун лиІари хъаттикІасе. Мугар макьа джиларик, Инсан хІавалат дакьас.

\* \* \*

Я дадахъ малар дахьуф, Са суърне далдам дахьуф. Я хула метехІ дахьуф, Са дургъу берхІем дала.

\* \* \*

Я идем, хуьмбеф дахьуф, Вакас Іассе кач хьурай. Я йургьа юруш дахьуф, Вакас дегин къвенч хьурай.

\* \* \*

КІатІуларин шал акьуф, Шалукас берхІем акьуф. БерхІем бегьем дахьуна, Дустарис цІикІин акьуф.

Арсуран квагІар акье, КІесдехІан дардар акье. Вун канеттис даичи, Кьекь итІи Іаджал акье.

\* \* \*

Я гавур, чІулан гардан, ЭшкІинарис аш акьуф. Я гавур, чІулан гардан, Джегьиларис дем дакьуф.

\* \* \*

Заварил кІаре къири, Я гавур, эшкІин къари. Вун фидахІан рахае, Вал алеф э са къари.

\* \* \*

Я руш, гьа ве суратиъ Андава намусна гІар. Ве зак пара бурж кейчи, Фашав ве кІваттар – сеІэр.

Хъуъхъве тукун яланчи, Ве хили архьафдава. Сурхай хандин Гюлбике, Я вал алчархьафдава.

\* \* \*

Канеф канеттис ичи Ве бавас женнет ирай. Руш канеттис даичи, Хъайе са хІуни кІирай.

\* \* \*

ДарагI са дар дахьурай, Джилик дувул кедавай. Бавахъ са кІиркІ дахьурай ЯхІна намус хъадавай.

\* \* \*

Рекъкъуън кІилил накъвар хьурай, Гьар са касди дуъгІве акъас. ХІуърин гъана мукъ хъурай Дустна душман хІар акъас.

АхІа багъдин ире хІач, ГІутІас дахьурай вафас. Кьефеси айе пази Фацас дахьурай вафас.

\* \* \*

КІилди дуьйил руцуна Рагъун нур фацас дахьуф. Гьар булахил ушуна, Ругъу хьед ухас дахьуф.

\* \* \*

Алихьуна кьулар Дахьас хьастава улар. Алчахьуна ругар, Рахас хьастава чІалар.

\* \* \*

Дуьнья даи касарис Эхират иджеф ирай. Эхиратра даичи, Эхир фи джуваб ирай?

Улар – уьнетІар дехІан ЙуркІуран мукьу, Іазиз. Рагъарна вазар дехІан Манзилин варха, Іазиз.

\* \* \*

Рагъ адавай варха дала МекІ атай мукьу кандий. КІилди дуьйин мал дала, Зе джегьил нур чу кандий.

\* \* \*

Дуьйил але нур фие? ХІуьрил але ун фие? Іуьмуьрдин вахт дахьуна, Джандис куьркьу дард фие?

\* \* \*

Агь, Магъуйин цІантук тук, Шавгьар алархьай рукъкъуф. ЦІару дагъдин джагвар ихьп, Галун рагъари уцІуф.

Накьварилле ругукас Вас гІадул йургъан хьурай. Ле ве магьи йуркІурас Накьварар хІалал хьурай.

\* \* \*

Акьая чун цІикІинар СеІэт чвас иджеф хьурай. Акьас аме касарис Гьаме ягъар агурай.

\* \* \*

Самурдин ахІа нацІу, Гъван фаадине, къум аме. Бав хъадавайде рушан ГІан утІуна, къарк хьуне.

\* \* \*

Сувар чеб, сад эйчинра, Суван кІилар сад дава. Инсанар сад эйчинра ГІана йуркІар сад дава.

Ире тукун ире нур, Ругъу дагъдис ярхІуне. Ай Іазиз, кІаре улар, Са байкъушис ярхІуне.

\* \* \*

Зас ІэмкІекас агуне вун, Агуне вун заварилас. Зун ве бугув гІвай агуне МуьхІуьббатин херарилас.

\* \* \*

Заву Іу хІад нурар ицІай Сад сайихъди сирнав цІая. Фикьас хьин Іуд дуьйил алдий ХІадарилас варха ая.

\* \* \*

Хьидин куьче нурари Джан ицІая, секин кьая, Дагълариас тІахІур-тІахІур Хьиттар гІвая, серин хъая.

Іуьссе касди, узай хуппур, Куталивра джил атІая. ХІуьруьхъасра, нацІун багув Сайи мегІни нас акьая?

\* \* \*

Хутурфая шаддисра ягъ Чуьллерисра, дарарис. Вари дуьнья – акьуна сагь Эл хутурфай заварис.

\* \* \*

Адава ягъ зе руьхІуь цІугъ дакьайде, ДагІатайде алаттарху вахтарихъ Аруцай зун гафарихъра дагвайде, Гьар са ягъа мукьу кьайде бахтарихъ.

\* \* \*

ДарихгІвели гьар легьзейи угайде, Пак Ватанин гьижранари уцІайде, Садпуна хи, терс лепейри утайде, КичикІина, хьед — ругаригІ цІурайде.

Зас вун мидах<br/>Іан мерте идеф XIай адуй.

Зас вун мидах Ган кане идеф ХІай адуй.

ЯгІа зас хІархьуне ве накьварил.

\* \* \*

Гьар са ягъ хье хьуная сад, Шад мажлисин тамадайра. Россия вун – джилар абад, – АхІа чу э, дара адад.

\* \* \*

Вун адине рагъара хъай, Вун хъугІвая угъал угъай, Хье йуркІарин сазара хъай, Хилис дагІвай гІулар хьидар.

\* \* \*

ГидахІан гис гагьул ий, Іашукь хьайде вахт адуй. Сус файдине, ине гис, Бугус гІвайде вахт адуй.

Хьед хьуная рекъкъуън сивил, Гъванди зафас гъуджай силис. Вархал-вархал хъугІвай хІуьрис, Кенду вакра дагъвийин гъисс?

\* \* \*

Инсани уъч инсан эй уъч ухІучи, Іуьмуър ина канде гъатта иланис. Са чихайин цІайра цІай э упучи, Эл герек э дем къурмишис инсанис.

\* \* \*

Эрменихъ малар пара, ДжагьутІихъ Іуьмуър фана, Са ягъа дахьурай, яллагь, Са ягъан Іуьмуър фана.

\* \* \*

Зун канеттис индава, ГІаджал акьас хьундава. Дакантисра зун ине, КвахІарра акьундава.

Бакуйис ушуттари Агъзур манат пул хъухай. ХІуьрарис ушуттари Джибин ацІу чІал хъухай.

\* \* \*

Сув ацІу мизе угъал, Алайкина рагъ хьурай. Дуьзди гІвайде тІахІур хьед Адайшуне мерте хьурай.

\* \* \*

ЦІейеф цІурасра дахьуф, ЦІуреф дургъасра дахьуф. Хъайе хъая агъас дахъуф, Іайеф агъас дахьуф.

\* \* \*

Пара ухьтан чуьлле лиф, Булахин кІилил алеф. Дадар – баварин мехІел, Къан шаккарил ухІуф.

Гадаяр руху бавар, Зегьметар дуу бавар. Ме дуьйилас гІвасдехІане Зегьметик кее бавар.

\* \* \*

Руг угурай Германин, Джегьилар къирмиш акьу. Багурхьурай Германи Джегьилар яваш акьу.

\* \* \*

Кандея канеф агвас, Кел руккуна хъаттахас. Акьуна маллайи кедж, Канеттис къисмат акьас.

\* \* \*

Сарабугъдин сару кІетІ Сад дала багъдил дахьуф. Чал батмиш хьу, Іазиз, Сад дала бавахъ дахьуф.

Тук багъларис ухшар э, ХІакь хье Іуйин чІал сад э, Адина вун укь шувас, Женнетин багъ хІазур э.

\* \* \*

XIад хIадуран тай хьурай, Серин рухаригI укьас. Талан къуш пази хьурай Алихьуна лап фацас.

\* \* \*

Угъал угъай хІуърин гимил дагъузай, Ахпа завун ачух акьай дарвазар. Іаджеб хьасий, абур гІвасий, элхъей гим. Бунар гуъррин ушучи ахъ, вархарих.

ХІуьрмет акье Іуьссеттарис, Вунра яшлу хьасе, бала. Хили, лаку звар андавай Вахтар васра гІвасе, бала.

\* \* \*

Тук ирирай зазуран, Ізъ кІари хьурай вазун Акье хиял агъзуран, ЧІал дагуна мезуран.

\* \* \*

Яраб кІесегьан агьай Дардар алеттар ая гьан? КІичин фикьасе агьай Хифат дуаттар ая гьан.

\* \* \*

Агь пуна эл гьаттучин, Диф хьуна сув ацІурай. ГІанан сирар акьучи Гинра хІалар сагь хьурай.

Джандил але дардари Джан дуасра гучІае. Гена айе хиялри Малдифас хьас гучІайе.

\* \* \*

АликІ цІейе тІабрикар АйчІурай муьштерияр. Аман фикьасе агъай Суракьи ая гьалуьрра.

\* \* \*

Рушас кане бахт ицІаф Къизилдин тІубал хьуне. Кьиблайихъас нур ицІаф Хъуьхъе рагъухъан хьуне.

\* \* \*

ХІуппар уза азалар, Келар укьа укунар. Гьар джуьрейин тукар, Девлет э хье, агъул сувар.

Арсуран сэІэт хьуна Вахтуна лихьас дахьуф. Джагвар шуьшейин лампа, Іашкъуна угас дахьуф.

\* \* \*

Ватан, зе ЧІаарин хІуьр, Вун э къапу дуьзгІвелин, Инсанарихъ хъай сабур Сагъ кІиларин мислеІатин.

\* \* \*

Асхар ицІа вахтари, Хуппурис гІвайде лежберар. Рагъ частунихъ рукьасти ГІадаркайе хуппури.

\* \* \*

Гьар шегьердин Вун рухаттис китабе. Зе Іакв э, Дагъустан, Кане Дагъустан.

Зе зегьметин нур, ХІакьлугІвелин тур, Зе дамах, абур, — Вун э, зе Ватан.

\* \* \*

Хьидарин къуват, Зе руьхІдин къудрат, Зе Іуьмуьр, зе бахт, – Вун э, зе Ватан.

\* \* \*

ЧІалал хай нацІвар, Бул бегьер ицІай, КІатІарра – ацІай, – Вун э, зе Ватан.

\* \* \*

Баракат джилин, Уьт суман тирин, Нини Іу улин, – Вун э, зе Ватан.

Канде зас, лап кан, Ве рекъкъуъ цІай джан, Игитарин макан, – Вун э, зе Ватан.

\* \* \*

Гашар, мекьер, тарг акьуф Партия, хІукумат э. Халкьдин йуркІар шад акьуф, Партия, хІукумат э.

\* \* \*

Авал авала хьуне, Авал замана хьуне, Авал заманихъди Ме дуъйил са кар хьуне.

\* \* \*

Гьавайилас маруца, ЛиІариф дафчархьас, Джиларик мугар макьа, Инсан хІавалат дакьас.

Завул але нур цІа хІад, Іашкъар але са затІ. Вун агвай зе йуркІ хьая шад, Бавахъ хъайе тек сад.

\* \* \*

Зе рушас дайцІай мажал Вари гис рекъкъер итІай. Тукун джан хьая, джинжал, КІил джил икІай адаркай.

\* \* \*

Іуьшти, багайми хьастехьан, ТІубалилас ладурфай. ХІуьрил мукъ хъугІвасегьан, Рушанна, бава себ ичай.

\* \* \*

Кьагьар, харарин бахта, Іурус рукьарин тахта. Рушас джикІи шуй агу, Нев дахьу суьлен бахта.

Ихьп уцІуна хьед хьуне, НацІвар хьед бул хьуне. Нечхирарин бахт хьуне, Уьрдегар хьиттал хьуна.

\* \* \*

РахІухъандин бахт хьуне, Нафт хъату чирагъ хьуне. ЦІамуя верра ис хьуне, Гьал вун хайде вахт хьуне.

\* \* \*

Гьал туку фацугуна, Зун Іурдин кехуни айи. Бахтар пай акьагуна, Зун инсанрин хуппахъ хьуне.

\* \* \*

БатІар багълар атуна Дагъарис джакъв адине. Дагъарин са ІачІанигІ Чаркварис муг акъуне.

Гьава суван улусум Сувалас сувал гІвафе. БатІар пурцІарин нечхир, Хьитталас хьаттил гІвафе.

\* \* \*

ЙуркІвар Іашукь акьуна, ЙуркІура ихьай муминар, Баракатар кан акьай, Агъасе чвас баядар.

\* \* \*

Ахиратин Іуьмуър ве КуьтехІ дахъа ерхеф хьасе. Миса хьазур дакьуттар Тиса вас багъа хьасе.

\* \* \*

Итта итталис фикьа? ЛуькІуь итталис фикьа? Итта иттал салам э, ЛуькІуь Іаджалис фикьа?

ГІулин бегьер адава, Тук рекІв алеф адава. ГІули дахьу бегьерар, Хье джандис гІвафра дава.

\* \* \*

ЯрхІу хару шим суман, ГІан далгъасра гучІая. Чинин пияла суман ЙуркІ чурхъасра гучІая.

\* \* \*

Ме дуьнья — фана дуьнья, Пайгъамбар найсая, дуьнья, Мал-къара къазанмиш акьу, Хилар найсая дуьнья?

\* \* \*

Джандил але дардари Джан дуасра гучІая, ЙуркІура хьу хиялари Малдифас хьас гучІая.

Сатти хиялар макьа, Хьира ул ииъ хьасе. Хьиран ул ииъ хьучи Вас дуьнья зулумат хьасе.

\* \* \*

Фикьас дуьйил хьуфегьан, Дуьйин дардар агвас. Фикьас бавас рухуне Накьварин Іазаб агвас?

\* \* \*

ЙуркІар кІаре инсанис КІаре зулумат э дуьнья Джанар сархуш инсанис КикІу чирагь э дуьнья,

\* \* \*

Джандил але дард акьас, ЯхцІур къари къуй кандий ЙуркІура айе дард ицІас Завун аршдил хал кандий.

Гьарай, гьарай акьуна, Гьараяр рукьафтава. Гьараярра акьуна, Уларис агвафтава.

\* \* \*

Рагъ ава, серин ава, Дуьньяйин фи гьава э. Бушдава, хІалакдава, Іурусатин фи закон э?

\* \* \*

Іурд эва ли, гІул эва, Рагъунан гуж адава. Вун йуркІурал хьугуна, Джандил джан уългвадава.

\* \* \*

Ве бугус зун адиная, ЙуркІ мурадрив ацІуна. Ухуна хьед зумзумин ме, ПашмангІвелар уцІуна.

Парзай булах Чирагъ
нацІус ушуне,
Магъу дере шагъид хьуне
садгІвелин,
Чирагъ нацІра Каспи хІуьлис
рукьуне,
Шагъид хьуне чуълле хъиттар
шадгІвелин.

\* \* \*

Диф алдея дагъдил Гетин, ЦІайлапанар къуъркьай ая. Іуьш рахая, дахьай секин, Дифар Іайи укъкъай ая.

\* \* \*

Угъалира хилар ламу Рукъкъу джилихъ ерхе акъай. Элкъея рагъ. Дагъ э зарлу Зе гучІхъубар гІуъргІе акъай.

Са руш шуне булахил, Хъуьсил алдий хал. Зе хиялра файтуне Кел суман рахай.

\* \* \*

Вархариас лап, вархариас лап Хъуркьая захъ зе Ватанин сес. Зас гьагишти ая, камди ая зун Зе джиларин цІикІинарин мез.

\* \* \*

Айдихъас адине диф, Іуьш адине дагъларил. Ушу исар хьай хІайиф, Алдея зун накъварил.

\* \* \*

Зун ахуни хадава, Агъзур хиял кІили ай. Цул джиларил адине, Къизилдин пеш хили ай.

Тук рагъунас элхъуъне, КІил гъагьадвай ругукас. Зе Іашкъунан тазанаг Хьуне гъагин юркІукас.

\* \* \*

Рекъкъ пуна ихъу лак Иттар хъуна фархъуне. Цил э пуна ихъу гъван ХарапІ хъуна гъушуне.

\* \* \*

Рагъ мизандил адине, Рагъухъан адиндава. Сувал цІаяр ярхІуне, ЦІантук тук агъучІундава.

\* \* \*

Рагъ ярхІунде рагъухъан Рагъун гирвайик кееф. Гьар бабатин тукун къач Чархунин гемел алеф.

Улусумин мугуйи, КІаре къаргъа укьунай. Агь хІадуран къафазис Хуьшрекин чал ярхІунай.

\* \* \*

Агъ талан алитІас Къизил къафазар акье. Якъут – мержам дуъхьуьна Кане ччи рекъкъуъл акье.

\* \* \*

Джагвар бухари бармак ХарчІе заварик кеттаф. ЧІичІ арсуран кІаре мин, Гъазе чІирилас атаф.

\* \* \*

Закас гьава лиъ хьучи, Зун чуьлларисра гІвасе. Чуьлдил але чуьлле кел Савтунилди гъушасе.

Къара хандин уъжгІвели Юруш акьай андава. Гехъуьнарин рушари Чин нуш акьай андава.

\* \* \*

Пара кандий акьуфе, Ширинарил ухІасе. Кьефеси айе гьаде Якк кихьайра ухІасе.

\* \* \*

Рекъкъ андава гъава су, Жерар джагвар джакъв алеф. Женнетин гъава тІагар, Гъамишан улик кееф.

\* \* \*

Сус лап багьа къизил э, КІилди дуьйис гуьзел э. Адина, хьурай шувас, Женнетин багъ хІазур э.

Хьиттан булахил кІандий, Дардарна гъамар акьас. Седефин йуркІар кандий. Фикирра дафчатас.

\* \* \*

Арсуран куьлегъ суман, Рут къизилдин багъ суман, Канегьан цІа вун агъай, Херас ярхІу рагъ суман.

\* \* \*

Женнетин гъазе зумруд, Шав зун вас агвар акьас. Ле вас кане мурадихъ, Шав зун вун рекъкъуъл акьас.

\* \* \*

Дардар кее инсанар Къвалалеттис агъафе. ХІадис руха маллавар Мазгитара агъафе.

Базар бембегин гуьгІен, Тук файчІуне завуас. ЙуркІ вахъас аруцуне, Вун вархал хьуне, цІантук.

\* \* \*

Женнетин ХІуьруьпери КІес хІайифти атуфе. ХІазретал АІли, Іумар, Кьабул давай икІуфе.

\* \* \*

Базарис ушугуна, Гьар шеунас ул куьркьурай. Ул куьркьуна адава, Кьисмат хьаф хили хьурай.

\* \* \*

Ругъу гъван ІачІак кей Іуьши ІамкІер гІвафева? Кане дуст раккарихъ хъай, Ахунар алчархьафева?

Іэъ арсуран испагьи, Вун къизилдив фай хьурай. ЦІантук але калагьа Вун тукаригІ гІай хьурай.

\* \* \*

Найч хьуне ве канегІвел, Мерк хьуна рукъкъунева? Найч хьуне ве тукун чІал, Тик дагьарил рукъкъунева?

\* \* \*

Паччагьарин арайи, Кварди, архьу яланчи. КиркІуна лап Іурдин мекь, ЦІаб кеттахъай, яланчи.

\* \* \*

Арсуран мизе чалар, Іаджейиб агъайду чІалар. ГІвай андава са фишра, Нас ярхІайе зун улар.

Гуржистандин багъдиас Емишар рукьаф эва. Пирдавус женнетдиас, Умудар аттар хъафева?

\* \* \*

Хаб алдаркай хаб гьишас, Зун ругьу илан эва. Зе чІалас джаваб дайцІас, Якк гІутІу душман эва.

\* \* \*

Улис нагъвар агуне, Жандис хажалат хъуне. Руш канеттис даичин, Бавас женнет даирай.

\* \* \*

Угъ угъал, ярхІ рагъухъан, Тукарис панагъ хъурай. ЯрхІ чангар, куъкІ чирагъар Че сусас хабар хъурай.

Руш дава вун шуьше э, Шуьше атІа алмас э. ГІвери агъзуракра кейэ, Вун къат айе къизил э.

\* \* \*

Сус лап багъа къизил э, КІилди дуъйис гуъзел э, Ине вунра йуркІ сусас, Женнетин багъ хІазур э.

\* \* \*

Хьед кане джагвар келем, Суварил диф алдея, Багьа шуьшейин кьалам, ЙуркІуран ният фи я?

\* \* \*

Час Іуйисри гІул кандий, ГІулин цІантукар кандий. ЦІантукаригІ аруцай, Чин Іудра хъай кандий.

Вархалас ярхІу улар, Вас дала куьркьастава. Аттархьайде ІуркІура, Вун дала дуафтава.

\* \* \*

Агь багъларин багъманчи, Вас багъдин хІал фи хІархьурай. АхІа нацІун хьед даухуттис, НацІун хьед фи хІархьурай.

\* \* \*

Са сувал тук хьуна, АрайигІ тикан хьуне. Сад сайис далчархьуна, ЙуркІ угуна цІай хьуне.

\* \* \*

Рагъра дагІва дерейис Рагъухъанар ярхІуне. УькІ дагъучІа джахвалил, ЦІантук тук кьисмат хьуьне.

ЦІаб кее цІантук ТинкІари яваш акьуф. ХІарф ае са йуркІ Са хІарфу яваш акьуф.

\* \* \*

Вун агуб улин Іакв э, Джан угуф ихьпин секв э, ДархІай улар фикьайе, Рагъун гуьне сурат э.

\* \* \*

Аттархьайде йуркІура Вун дала дуайдева. Алархьайде уларис Вун дала агвайдева.

\* \* \*

ХІуьрерин ахІа валари ХІуьри ай дагваф э гьан. ЙуркІурас канегІвелди ТемехІ датІаф э гьан.

Умуд кееф адава сара, Хьундава дардунас чара? ГІамидахІа ахІа хІуьри Вас канёф хьундава сара?

\* \* \*

Бала дуй, валлагь, УькІуьн дагълар давайчин. Бала дуй, валлагь, Тукун Іуьмуьр давайчин.

\* \* \*

Ирс келегъа яйлукъ КІилилра вун маликІа. Че вас пара минете Хиларик вун макерхІа.

\* \* \*

Сувар суварис дагвай Рагъна ваз къаншар хьуне. Час хабарар адавай Руш хІуьрис къирах хьуне.

МуьгІверил къуяр акьай, Къаравул хъай аруца, руш, Къачагьар пара хьуна ХъаттикІина файшу руш.

\* \* \*

Агь шегьердин шабалут, Ширинарикас акьуф, Агь, Баккуйин шабалут, БатІаргІвелихъас гъушуф.

\* \* \*

Вархалас агугуна Зар кейе ирс зарбаф. Бугулас агугуна Зар кейе хъуьхъе къизил.

\* \* \*

Сувас нурар ярхІуна Гьал цІантукар айчІуне. Рагъ мурзайил адина Рагъухъанар адине.

Яккари ацІуф э вун, КІеджари цІуруф э вун, ХІуьрина Пери дехІан ЙуркІура дууф э вун.

\* \* \*

ГІвайде рекъкъ ягъур хьурай, Алайшиттис багъ хьурай. Алайшу багъларикас ЙуркІурас мурад хьурай.

\* \* \*

Вун суван саркІар эйчи, Сувал чардахар акье. Ве йуркІурал зун алчи Дардарис булах акье.

\* \* \*

Шав, йе руш, вун удигьти, Ире берх емар алдий. Фиш хъучайшуне бавахъди, Аман-минетар акъас.

Адине зун мич рухас, Іакьул пара гъушасра. Амма зас вун агуна, Канхьуне вун йуркІурас.

\* \* \*

ТегІди лакар мафатхьа, АгудехІан маІаша. Хье Іуйин дардар-хІалар, Гьал хъаттакьас, яваша.

\* \* \*

Шав вун, шав вун зе бугус, Вун хъадавай зун кІесе. Шав адина, зе йуркІ гъуш, Вун фидахІан залуме.

\* \* \*

Ве тур фацай аруцуне, Ве тур агъай дуъйил хъуне. Ве канегІвел гулуне, ЙуркІуралас зун шуне.

Гьава сувар гьазе хьая, Рушан яшар бегьем хьая. Тин агьаттар пара хьая, Фи бат!арфе агьул руш.

\* \* \*

ЧІал упучи пашман хьасе, Уларилас нагъвар гІвасе. Кандава зас, кандава, Пуч хьуна джегьил Іуьмуьр.

\* \* \*

ГІулин ягъа вун кІине, Бав захъ сара хъандава. Джегъил Іуьмуър пуч хъуне, Бав сара джикІастава.

\* \* \*

Іазабик хьу кІиркІ баван, Накьварин Іазаб дагурай. КанегІвелди йуркІ зун иф, Джегьил джилик даутІурай.

Вархалас ярхІу улис, Вун дала агвадава. Аттархьа зе йуркІурас Вун дала гІвадава.

\* \* \*

Гуьне верхІар уцая, Парзайис ул ярхІая, Пара канеф улис дагвай, ЙуркІ Іашали ацІая.

\* \* \*

Адине чин раккахъди, Гъайш ле вун дакІарихъди. Мезар-Іамалар акьай Файдине руш раккарихъди.

\* \* \*

Укунихъ хъайе тукар, Чвас кане-даканф фие? Тукарик кее цІабар, Че мурад-метлеб фие?

Я руш, вун найс айий? ГІуд хьуна хуппурив гІайиъ. Вун суман батІар рушар, Че хулан мурту айи.

\* \* \*

Уьдигьас кьунарин КІарчар къизилдин хьурай, Хуппахъ хъас хурурин Улар Іакветтар хьурай.

\* \* \*

Агь пуна фацу фикир, Хъаттакьас чуьллер кандий. ЦІай керхьуна угу йуркІ, Са ягъ хьу суман дава.

\* \* \*

Агъуларин сувари, Са тук яшамиш хьунай. Тук, зун ве дардар ухІай Рукъкъай, цІурай гъузуне.

Ругъу булах, ругъу булах, Агъуларин ругъу булах. Ругъу булах, ругъу булах, Кандийхи, ухай, укьас.

\* \* \*

Ме хье гьава суварис, Тукарин ранг адирай. Хье хІуьрин джегьиларис Бахтлу ягьар агурай.

\* \* \*

Хъуьхъве тук, ирс цІантук, ЙуркІураъ уркьас гучІа. Хъуьхъе тук, ирс цІантук ЙуркІуралас гІвас гучІа.

\* \* \*

Гьар замандин джегьилар Вари бахтлу хьурай. Заманайрин инсанар Багьдин ІэІэни хьурай.

Агъулар, чвас фи хьуне? Чве джига фас далгъуне. Шав са джигайил хьас, Дадан, баван яхI ухIас.

\* \* \*

Шав хьин дуьйил даукьас, Дуьйилас гьишина гІвас. Шав хьин хІуьри даукьас, ХІуьрилас хил хъагъушас.

\* \* \*

Хаб алдаркай вун гьишас, Зун ругъу илан дава. Мезуран джуваб дайцІай Ве дад кІи душман дава.

\* \* \*

Фикьайе хьин маларикас, Малар ду хье ширан джанар. Фикьайе хьин хуларикас, Хулар ду хье суван кІилар.

ДарагІ тек дар дахьурай, Джилик дувул кедавай. Бавахъ са кІиркІ дахьурай. Хуппахъ уъммет хъадавай.

\* \* \*

Дадар баварин мехІел, Вун Аллагьти ухІурай. Чияр чуярин цІигел, Вас Аллагь куьмек хьурай.

\* \* \*

Ватан! ЗатІ адава зурба валас, Гъурбати ве хІархьасе къадри. Ве гьар са гъван, сув, дере, булах Зе панагъ э, багъа э зас зе джандиилас.

\* \* \*

Дуьньяйис адинде инсан Іуьмуьрди дуая рагьухьди, Дуьньяйиас хъугІвайде инсан Чалишмиш акьая ругухъди.

Сад ая хъуккай девлетрихъ ах а, Сайи акьая уъджг велар пара. Іайег вел акъуттин сархуш хьая х Гал, Сейин кафалихъ хъуркъая пая.

\* \* \*

Агъул дагълар – Магъу джигъир, Несилрин няхІс шуне Іуъмуър. Ме даргІвелар хьуне кьисмат, ДакангІвелар акьай нуьсрет.

\* \* \*

Галухъ дагъди Шамилан рекъкъ, Гъич кас дагвай хъуне баят. Рекъкъуън гъвандил-кІедарин эхъ, Заварира – кІаре баяд.

\* \* \*

Багъа хулар, машин цІейе, Къизил, якъут, хьирра-нини. Гъузу дакьай гунтІ акьай мал, Мишти хьучи-гуласе чІал.

Четине йуркІурал хъухас алатархьу ягъ Хуппахъ хъая ве мичІ, гулагъ, зиннет. Фи ая удигъ – арифдарри вас Агъая хи: «Ме багайис э ве

\* \* \*

туыгьмет».

Хьин хІазур э руьхІ маса цІас шайтІанис, ЙуркІ але дуст, элхъей-элхъей душманис. Ме дуьньяйил Іамал, иттал алдея, Инсаф дакьай лекеяр хай вижданис.

\* \* \*

ХІуьлерихъас ади дифар, Дагъдин кІилихъ цуьппе махьа. Хили ая кІаре кучар, Вун гафарис мискьи махьа.

Гъуърегъилрив ацІу алчархъуне муг, Яваш-яваш гІвагуна дагъларис агъул, Фи айчІвасе гуърриас ягІа. Я начхирар, я иланар ругъу.

\* \* \*

Пара хІая хьин, йе руш, хьес, Эйчинра чІукь кьимат ицІая бахтунас, Ягъалас ягъа гьаттархьая хьин, Элхъуь дакьай хьес инде вахтунас.

\* \* \*

Харна ихьпар фидахІан Угьасе кІилил. КІилилас чІар гІвая зе, Аруцай джилил.

Дуьйнас рухасе дуьнья, Баванра фуншас шинюк суман. Фи ухьтане Баван суман дуьньяйин хъуьси.

\* \* \*

Чигифас, ихьпарифас эбеди иде Ругъуная вун, булахин хьед. Ругъас кьая наврузбегер Ве бава, йе руш, гъузаркьай лап бед.

\* \* \*

Дагъдин кІилил але ІуькІер, Чун хІуппарис кьисмат хьасе. ФидахІан дамах кьучира, йе руш. Шувас душучи, вун баят хьасе.

\* \* \*

Завул Іу хІад, нурар ицІай Сад сайихъди сирнав цІая. Фикьас хьин Іуд дуьйил алдий, ХІадарилас варха ая.

Ме дуьйейи чІукь дустар хьундава Са гелаас, фикирарра сад эй шуттар. Эйчинра зас чуяриласра хьуне багьа Пашман ягьа, четин ягьа са джигайил хьуттар.

\* \* \*

Ягъакас Іуьт хьуна канде темпелис, Далаттуркьай гьич са карра уьчифас Диреттари Іуьтарикас гъуджафе Ягъ, са бицІи ерхе хьурай, агъафе.

\* \* \*

Эгер начагъ хьунайчи чун, ГучІ махьа чвас дарманрихъас, Эгер хъайчи вафалу дуст, ГучІ махьа гьич душманрихъас.

## ИСПОЛЬЗОВАННАЯ ЛИТЕРАТУРА

- 1. *Ахмедов К.А.* Избранное. Сборник стихов. Махачкала, Дагестанское книжное издательство, 2018.
- 2. *Базиева З.М.* Отражение жизненного опыта в агульских пословицах и поговорках. Проблемы жанра в филологии Дагестана. Махачкала, ДГУ. 2013.
- 3. *Гашаров Г.Г.* Лезгинская ашугская поэзия и литература. Махачкала. Дагестанское книжное издательство, 1975.
- 4. *Мазанаев Ш.А.* Агульская литература. Махачкала, Дагестанское книжное издательство, 2011.
- 5. *Назаревич А.М.* В мире горской народной сказки. Махачкала. Дагестанское книжное издательство, 1962.
- 6. Тарланов З.К. Агульские песни и пословицы. Петрозаводск. 2003.
- 7. Рукописный фонд НИИ ДГУ имени А.Ф. Назаревича.
  - 8. Ахмедов К.А. Личный архив.

## Агъулрин Халкьдин хазинаяр





Дагестанское книжное издательство Махачкала 2021



Агульские народные песни

На агульском языке

Редактор и составитель К. Ахмедов Художник В. Абукаджиева Художественный редактор М. Левченко Технический редактор В. Гаджиева

Лицензия ИД 05334 от 10.07.01

Подписано в печать 31.05.2021. Формат 70х90¹/<sub>32</sub>. Бумага офсетная. Гарнитура «SchoolBookC». Печать офсетная. Уч.-изд. л. 2,4. Усл. печ. л. 3,8. Тираж 300 экз. Заказ № 871. Цена свободная

ГАУ РД «Дагестанское книжное издательство» Министерства информации и печати РД, 367000, РД, г. Махачкала, ул. Пушкина, 6

Отпечатано в ООО «Издательство «Лотос», 367000, РД, г. Махачкала, пр-кт Петра I, 61

Ме «Агъулрин халкъдин хазинаяр» китабин составитель Камалдин АхІмедов э, автор Российин писателрин Союздин член, зегъметин ветеран, РД-ин халкъдин образованин отличник э.

К. АхІмедова агъул, лезги, Іурус чІаларил поэзин «Жегьилрин сесер» (уртах), «Рагъухан», «ІэкІен кІилар», «Парзайил булах», «Джагвар ихьпин дуъруьхІалар», «Гим», «Хиялрин муг» (гІаттунде чІалар), «Агъул мегІни», «Магъу дерейин авазар», «Гагъ угъал, гагъ рагъ», «Заварис вайзар», «Дагъустандин постсоветский девирдин поэзин антология» (Махачкала, уртах), «Але аямин Российин поэзин антология» (Москва, уртах), генара сара китабар аттихьине. Агъул халкъдин тарихи сифта эй поэзин «Агъул мегІни» (1992) китаб чап акъуне.